

BÀ SÓ TÌMÀTÉYÒ **Bà só bà cu wáràgà mì Páwòlò jì** **Tìmàtéyò**

¹ Njínó a ye tí Páwòlò tí mbe gí tí tú mì Bìndi-Mbírì tí Jézù 'do gbí có mì Mbírì. Mbírì je ye, tacó wàa ye 'ví dù tí mbe ma có 'válá tí nó mbe cee lá, náa yì tí Mbírì táánò ci cí máa yì bà je jì ndâ 'duù ñínó bà gí tí ndâ mbe kù dù toko ta Bìndi-Mbírì tí Jézù nò. ² Ye kù cu wáràgà tí nó tacó bà 'dè có jì wò tí Tìmàtéyò, tí kpóló-kpolo 'viì mì ye, máa, ye kù 'deke tí ye jì Bu ndoo tí Mbírì, ye delè kù 'deke tí ye jì Bìndi-Mbírì tí Jézù tí Mbe tí ndoo, máa ndú 'ví bàkà nambeè jì wò, ndú 'ví ñò yê ọ lo, ndú delè 'ví si wò 'ví dù ta 'dê njembí lo.

Kì nò tí Mbe tí ndoo lá

³ Ye má koọ có tí lo, ye kù 'dè ñìkì maa jì Mbírì. Mbírì tí nó tí Mbírì mì ndâ ká gù ndà, náa ndà kù bàkà nèté jì yí gbí cèè kpokèjì nò. Ye ta o 'dáá gí kù koọ có tí lo ta o tí nó náa ye má kù 'deke tí ye jì Mbírì. ⁴ Ye má koọ có bà 'dù ngo-ọ lo táánò ta o bà njèè gbí òkò tí ndà nó, go bà ñò wò má a i mbe zi ku, à kpónó zi ye gí. O bà 'de tí ndà káká'ì ta 'bí o wúnò bà me líkí tí ye ta ọ wálá. ⁵ Mbí ye kuu tí ọ bà tee njembí lo mítí Bìndi-Mbírì tí Jézù. Wò 'de ọ njembí tí nò me 'do to lá. Ndâ gù lo Lùyíjà, tí nawu nawu lo, ta nawu lo Yúnìsì, delè táánò káa ndâ mbe ùnje gítí Bìndi-Mbírì tí Jézù go i mì lo nò. À kpónó teke-tèkè mì lo nò

káa gbèe ña bà ùnje mì ndú táánò nò, ta kponje tí wálá.

⁶ Má éno, ye kpónó kù 'va a mbí lo, máa, wò 'ví kili wu gí tà i-nambeè tí nó táánò náa Mbírì je jì wò ta o bà bàkà wò mì ye tí mbe nìbà i nò.

⁷ Tacó Mbírì táánò je jì ndoo me bèrì mbe si ndoo 'ví dù tí ndâ mbe kì nò kùro ndâ 'duù nó lá, yí je jì ndoo a Bèrì mbe je wotí bà zeke gbí ñì ro ndâ 'duù. Bèrì tí nò a mbe si ndoo 'ví zè Mbírì ta tó njembí, yí delè a mbe si ndoo 'ví dù tí ndâ mbe bàkà i-'vii lá.

⁸ Má éno, wò 'ví cì gúku lá, wò delè 'ví kì nò tí bà ma có tí Mbe tí ndoo lá. Wó delè 'ví kì nò tí ye tacó náa ye kpónó kuu gbí zàà á muu wó nò lá. Gbì gbí njembí lo gítí bà kònò sé'i muu bà ma Banga-Ngú-Có mì Mbe tí ndoo, sé náa Mbírì je wotí gítí jì wò gî nò. ⁹ Mbírì 'vala ndoo 'do gbí vò i, bìndi yí gii tè'é tí ndoo, máa ndoo 'ví dù tí ndâ 'dóó 'duù mì yì. Yí tè'é tí ndoo me tacó máa ndoo bàkà a 'bí i mbe nìkì ma nò lá. Yí bàkà éno 'do ká gbí 'dóó nambeè mì wó, ta nderè ká mì wó. Yí bàkà nambeè tí nò táánò jì ndoo ta rè mì Bìndi-Mbírì tí Jézù á kùro bà suu to tí nò.

¹⁰ Káa a Mbe tí ndoo tí Bìndi-Mbírì tí Jézù kpónó ká gii rò wotí mì ku gî, ta bà ma Banga-Ngú-Có gítí 'válá ñinó mbe cee lá nò.

¹¹ Mbírì táánò cu 'bì wó mítí ye, máa ye dù tí tú mbe ma Banga-Ngú-Có tí nò, delè tí mbe nìbà .

¹² Ñinò a nderè có bà mbu ye nó kpónó ká nò. Kpétí ká éno, njembí ye mù lá, tacó ye ñò Jézù tí 'duù tí nó, náa ye kù tee njembí ye mítí wó nó, ni gî. Ye delè gii ñò ni ngbárángà'i gî, máa, wotí bà kpolo tí i tí nó náa yí je jì ye máa ye 'ví kpolo

tí yee tí o bà ko mboo nèté mì ndâ 'duù nó, kuu tí wó. ¹³ Má éno, kpolo tí cèe có tí nó táánò náa ye 'dè ji wò nô. Wò delè 'ví 'vanda jé káa ndi ndú ndírí ji ndâ 'duù tí nó náa wò kù nibà i ji ndú nô. Dù ta bà tee njembí lo mítí Bìndi-Mbírí tí Jézù, delè ta bà zè yí nìkì maa. ¹⁴ Kpolo tí tó i tí nó táánò náa à je ji wò nô; kpolo tí ta wotí mì Bèrì-mì-Mbírí tí nó mbe kù 'vala gbí njembí ndoo nô.

¹⁵ Wò òò ni gí máa, ndâ Fìgélò, ta Èrèmàjìnìsì, ta sè ndâ 'bí 'duù gbí ndâ to Àsìyà kpónó 'dáá mò tí ndú 'do tí ye gí nó gí. ¹⁶ Káa Mbírí 'ví si ndâ 'viì kòtí Ònèsifórù, tacó a yí ta ndâ 'bí o táánò ká kù 'dèe njembí ye ta bà gala ye ta nô ọ́ wó gítí nderè bà zèe ye mí gbí zàà wálá. ¹⁷ Ta o bà yee yí gbí gbata Rómà táánò, yí pà ba tí ye ta njembí wó gbaànjé yee tí o tí nó náa yí gii 'de ye gí. ¹⁸ Mbírí 'ví konì yí ta ndòngbú o wúnò. Wò delè òò ọ́ nambeè tí nó táánò náa yí kù bàkà ji ye si ye gbí gbata Éfàsù kà nó ta ọ́ lo ngbárángà'i gí.

2

Tó àsikèrì mì Bìndi-Mbírí

¹ Mbírí bàkà nambeè ji wò ta ọ́ rẹ̀ mì Bìndi-Mbírí tí Jézù gí, 'viì mì ye. Má éno, dù tí 'dakò, tacó wàa, ² wò 'ví 'dòkò ndi bà ma ndi ndâ có ònìó táánò náa wò 'di 'do gbí nje ye á kùro ndâ 'duù nó, ji ndâ 'duù ònìó náa wò kù tee njembí lo mítí ndú nó, wàa ndú delè 'ví 'dòkò ndi bà ma ndi gbèe có tí nó gí kùro ji ndâ 'bí 'duù.

³ Má éno, kònò bà sé'i ònìndi lo go i mì tó àsikèrì mì Bìndi-Mbírí tí Jézù. ⁴ Wò òò a àsikèrì 'di ta go

bà dù tí kùro ndâ 'bí ka wó tí wó jé ká kù ño 'dì á nje nèté? ⁵ À kù bàkà ndâ i 'dáá ká ta ña kpokèjì bà bàkà ndú. Káa 'duù ma có me tí ña kpokèjì tí nò náa à tí nò lá, mbe wu gbí wó wálá. ⁶ 'Duù má zèè bá kâ tí kpoò, to bà 'boo yí wálá. ⁷ Koṛo gbí ndâ có tí nò náa ye 'dè ji wò nò, bìndi Mbíri bà je muu bà 'di gbí ndú ji wò gí.

⁸ Je mbí lo mítí Banga-Ngú-Có tí nó táánò náa ye kù nò ta bà ma máa, Jézù tí Bìndi-Mbíri, tí 'viì-gù Dàvidè, 'vala ndi wó 'do gbí muu'dú wó gí, nô. ⁹ Ye kpónó kù kònò sé'i ta 'bò tí kò ye, goólá ye bàkà a 'bí ña gbolò vò i nó gbí có tí nò. Kpètí ká éno, có mì Mbíri me 'bí i go ñi ña wàa 'duù 'ví nè mí gbí còngò nò lá. ¹⁰ Má éno, ye bà kònò ndâ sé'i tí nò 'dáá gí tacó tí ndâ 'duù ñinó náa Mbíri ruka ndú tí ndâ 'duù mì wó nô. Tacó wàa, ndú delè 'ví 'de 'válá ñinó mbe cee lá nô, wàa ndú 'ví dù ta líkí'o tí ndú ta ndâ Bìndi-Mbíri tí Jézù dúú bà ya tí á tí banga bàndò. ¹¹ Có náa wò 'ví tee njembí lo mítí a có tí nó, máa,
«Ndoò táánò má cì ta ndâ Jézù,

ndoo delè bà 'vala ta ndú.

¹² Ndoò má kònò tí ndoo,

ndoo delè bà dù tí ndâ kpo-kpò gba ta ndú.

Ndoò má 'boo yí,

yí delè bà 'boo ndoo.

¹³ Ndoò má a ndâ lókó-loko 'duù,

yí ta o 'dáá gí káa 'duù ñinó jáá nô,

tacó wotí bà 'boo tí wó, tí wó wálá.»

Tó mbe bàkà nèté

¹⁴ 'Va mbí ndâ 'duù mì lo gítí ndâ kpóló-kpolo có tí nò. Wò delè 'ví see ndú ji Mbíri, máa ndú 'ví tò kponje gítí ndâ có ñinó ta gbí ndú wálá nó

lá. Tacó ndòngbú tó i mì ndâ ña ndâ kponje tí nò káa bà ñònòkò muu ndâ mbe kù sè tù ndú gítí ndâ ña ndâ kponje tí nò. ¹⁵ Bàkà wotí mì lo, tacó wàa wò 'ví ya gí kùro Mbíri ta nô ro lo wálá, go i mì 'duù ñinó mbe bàkà ngbárángà nèté, tí 'duù ñinó mbe nibà có mì Mbíri jáá.

¹⁶ Wò 'ví ya gí gbí ndâ kponje ñónókó mì ndâ 'duù ñinó ta gbí có mì ndú gítí Mbíri wálá nó lá. Tacó bà tò kponje ta ndâ ña ndâ 'duù tí nò kù tooko 'duù me 'dú 'do tí Mbíri. ¹⁷ Ña ndâ kponje ñónókó tí nò kù dèèkè go bà dèèkè kàngàndononô. Ndâ 'bí mbe kù nibà ndâ ña ndâ có ñónókó tí nò ji ndâ 'duù a ndâ Ìmàányò ta ka wó Filétù, ¹⁸ tí ndâ mbe gírì'o 'do tí kpokèjì mì yúcó gí. Ndú kù ñònòkò muu ndâ mbe ùnje gítí yúcó. ¹⁹ Kpèti ká éno, Mbíri sè tà 'bá mì wó ta díi rìtì gí. À cu mítí su-sú 'bá tí nò, máa, «Mbíri ñò ndâ 'dóó 'duù mì wó ni gí.» À gii cu 'bí, máa, «Mbe 'dè có máa yì a 'duù mì Mbíri 'ví mò tí wó 'do tí bà bàkà lé-lé i gí.»

²⁰ Ña ndâ ká'i bà zò i gbí gbolò 'bá 'dáá me ká gbaànjé lá. Ndâ cèe ká'i bà zò i ta ndâ kpo-kpò o kuu tí. Bindi ndâ ña ñinó náa a kù zò i gbí ndú ta rì 'dáá gí nó ká kuu tí. ²¹ Má éno, 'duù má kii'bà 'do tí ña ndâ vò i tí nó náa ye 'dè có gítí ndú nó gí, yí bà dù tí cèe 'duù mì Mbíri, go ndâ cèe ká'i ñinó náa mbe 'bá mò ndú gí ndii kpolo ma gítí ndâ kpo-kpò o, wàa gbí ndú 'ví dù cóó-cóó ká ngbárángà'i tacó nèté nô. ²² Tè gí tàkò có mì ndâ i gbí kù yo tí ndâ 'vii-'dakò lá. Je mbí lo tí kpoò a i gítí bà bàkà ndâ tó i. Wò 'ví tee njembí lo mítí Mbíri. Dù ta tó njembí lo gítí wó.

Wàa wò delè 'ví dù nìkì maa ta ndâ 'duù ñinó ta ngbárángà njembí ndú, náa yo kú 'deke tí yo ji Mbíri ta ndú nò.

²³ Yuu nje lo gí gbí ndâ kponje ñónókó, ta ndâ có ñinó ta gbí ndú wálá nó lá. Tacó wò ñò ni gí máa, ndú kú gí ta gbínje gí gbí òkò tí ndâ 'duù.

²⁴ Káa bòò mì Mbíri bàkà gbínje lá. Yí a mbe bàkà nambeè ji ndâ 'duù 'dáá gí, yí a tó mbe nìbà i ji ndâ 'duù, yí a mbe du njembí, ²⁵ yí delè 'ví túbà bà lê tí có mì ndâ 'duù ñinó ta có mì ndú ya toko ta có mì wó lá nó ji ndú pétékè'i, ta bà koṛo có máa, ndâ-'bî-lá, Mbíri bà 'visì muu ndú gítí bà ñò yúcó. ²⁶ Muu ndú má gí gítí ndú gí, ndú 'ví njaanga miṛi ndú 'do gbí wú mì Gba-vò-i náa yí zèè ta ndú, bindi yí giì bàkà ndú tí ndâ bòò mì wó nò.

3

Ndâ ndòngbú sili

¹ Te mí gbí muu lo, máa, ndâ i kèjì gí bà me kpoò gbí ndâ sili tí nó gí nje o nó ngé. ² Tacó ndâ 'duù bà giì koṛo có ká gítí 'dóó miṛi ndú, ta có gítí ndâ gùrúsù mì ndú. Ndú bà giì si tí ndú tí ndâ mbe mòò ṛo, ta bà wu gbí tí ndú ta kpéétí ndú. Ndú bà giì dù tí ndâ mbe 'dè kù có, delè tí ndâ mbe ngbútù ji ndâ bu ndú ta nawu ndú. Ndú bà giì dù tí ndâ 'duù mbe ñò 'duù ñinó mbe kú bàkà tó i ji ndú nó ni lá, tó i mì ndú delè bà giì dù wálá.

³ Njembí bà giì dù tí ndâ 'duù wálá, delè nambeè bà giì dù gbí yì ndú wálá. Ndú bà giì dù tí ndâ mbe waaka có, delè tí ndâ voló-volo 'duù. Ndú bà giì dù tí ndâ kàzà, delè tí ndâ mbe sogo ndâ tó i. ⁴ Ndú bà giì dù tí ndâ mbe ba ngbù ndâ 'bí

ka ndú, delè tí ndâ mbe bàkà ndâ i-ḡónókó. Ndú bà gii dù tí ndâ mbe luguu tí. Àá bà gii dù tí ndú a go ndâ líkí'o bìndi Mbírì. ⁵ Ndú bà gii tù ngba ndú, máa ndâ yì a ndâ mbe 'di có mì Mbírì, káa có mì Mbírì gbí njembí ndú gbaanjé wálá. Má énon, kpolo tí lo 'do tí ḡa ndâ 'duù tí nò.

⁶ Tacó ndâ 'bí 'duù gbí òkò tí ndú a ndâ mbe bàkà lì'vì mì ndú mí 'bá mì ndâ 'duù, tacó bà rì muu ndâ niì ḡinó ta muu ndú mbe me njí'dí, mbe bàkà vò i ndii muu ndú gí, delè njembí ndú me fùlà-fùlà, náa ṛo ndú 'de to lá ta go ḡa ndâ i 'dáá gí. ⁷ Ndâ ḡa ndâ niì tí nò ta o 'dáá gí kù tala i, káa bà ḡò yúcó ni kpò ndú gí. ⁸ Ndâ ḡa ndâ 'duù tí nò mbe kù ḡonòkò muu ndâ niì tí nò a ndâ mbe tò kponje gítí yúcó, go i mì ndâ 'dakò tí nó dígíséé ta ṛè ndú a ndâ Jènésì ta Jàmberésì, mbe go 'véṛè tí có mì Mòze nò. Muu ḡa ndâ 'duù tí nò volo gí. Bà 'di yúcó delè kpò ndú gí. ⁹ Káa ndâ ḡa ndâ 'duù tí nó mbe kù ḡonòkò muu ndâ 'duù nó bà ya ta ḡa kpokèjì tí nò gí kùṛo wálá. Tacó ndâ 'duù bà gii 'di gbí ndú ni go bà 'di gbí ndâ Jènésì ta Jàmberésì ni mì ndâ 'duù dígíséé gí nò.

Ndòngbú bà kpo-gbí-tà-tù Timàtéyò mì Páwòlò

¹⁰ Ye me ḡú tí ye jì wò lá, Timàtéyò. Wò táánò ḡò ndâ ḡa bà nìbà i mì ye jì ndâ 'duù, ta ḡa cè bà 'vala ye, ta nderè bà 'vala ye, ta bà tee njembí ye mítí Mbírì, ta bà me duù mì njembí ye, ta bà zè ndâ 'duù mì ye nìkì maa, ta bà kònò tí ye gí. ¹¹ Wò delè táánò ḡò bà mbu ye, ta bà mèèkè'i tí ye mì ndâ 'duù, ta ndâ ḡa ndâ vò i tí nó mbe

'de ye gbí ndâ gbata Àndiyókì, ta Ìkóniyùmù, ta Lísítàrà nó gî. Ye kònò ndâ bà mèèkè'i tí ye nò 'dáá gî, Mbíri delè gii 'vala ye 'do gbí ndú gbaànjé-gbaànjé 'dáá gî. ¹² Má éno, wò kpónó ò ni ngbàrángà'i gî, máa, kponje gítí bà mèèkè'i tí 'duù ònó mbe kú jè ta bà bàkà go có mì Bìndi-Mbíri nó wálá.

¹³ Káa ndâ vò 'duù, ta ndâ mbe tirì kèjì gí bà zì ta nèté mì ndú ndii ònó sàà kùro nó gî. Ndú bà eendi ndâ 'duù, à delè bà eendi ndú. ¹⁴ Káa à má gítí lo, wò 'ví 'visì muu lo 'do tí có tí nó táánò náa à nìbà jì wò káa wò gii ùnje gítí ta njembí lo gbaànjé gî nó lá. Mbí lo delè 'ví ò tí ye tí Páwòlò, ta ndâ 'bí ka ye ònó táánò mbe nìbà i jì wò nó lá. ¹⁵ Mbí lo delè 'ví dù ká kácáá tí ndâ có tí nó táánò náa wò 'di 'do gbí wáràgà mì Mbíri 'do gbí 'viì lo ò. Tacó a ndâ có tí nó ká je muu jì wò gítí bà 'de 'válá, ta bà ùnje gítí Bìndi-Mbíri tí Jézù. ¹⁶ Delè tacó a Mbíri táánò ká wu ndâ có tí nó mí gbí muu ndâ mbe cu ndú. Nèté mì ndâ có tí nó kpolo ma a bà nìbà yúco jì ndâ 'duù, ta bà yù gbí ndâ vò i mì ndâ 'duù jì ndú, delè ta bà túbà cèe kpokèjì káká'i jì ndâ mbe gírì'o gî. ¹⁷ Ònò a ò kpokèjì bà 'viindi tí ndâ mbe kaa tí ndú jì Mbíri gî, gítí tó nèté.

4

¹ Ye kú see wò jì Mbíri, ye delè kú see wò jì Bìndi-Mbíri tí Jézù tí 'duù tí nó bà gii dù tí mbe waa có jì ndâ 'duù 'dáá gî ò. Ye gii see wò delè jì rì bà gí Bìndi-Mbíri gí bà dù tí gba muu to tí nó, ² máa, wò 'ví nanaka muu lo mítí bà ma có mì Mbíri jì ndâ 'duù. Go bà 'di má tí ndú, à nìkì

ma; go bà 'di tà má tí ndú wálá, sè ñìnò a ñìndi ndú. Je kponje 'do nje ndâ 'duù gî. Do mítí ndâ mbe ngbútù, wò delè 'ví je wotí gítí bà ùnje gítí có tí nó náa wò kù ma nó ji ndâ 'duù. Káa wò 'ví si njembí lo 'ví dù lèè ta o tí nó náa wò kù ñìbà i ji ndâ 'duù nô. ³ Bàkà ndâ i tí nó náa ye 'deke ndú ji wò nó kpónó, tacó 'bí o bà gii gí wúnò náa go bà sè tù gítí yúcó bà gii dù tí ndâ 'duù wálá. Tù ndú bà gii njaanga a i gítí bà 'di ndâ 'bí tende có mbe ñìkì tí ndú, náa ndú bà gii kili ndâ mbe ñìbà i mì ndú mbe 'vii ta ndú, tí ndâ mbe ñìbà ndâ i tí nó ji ndú. ⁴ Tù ndú bà gii njaanga a i gítí bà 'di ndâ tà-ká-tà mì ndâ ká gù ndú á bìndi yúcó. ⁵ Káa wò 'ví kpolo tí lo máa, muu lo 'ví dù tí tó muu ta o 'dáá gî. Zèè njembí lo ta o vò i, bàkà nètè bà ma Banga-Ngú-Có. Wò delè 'ví bàkà nètè tí nó náa Mbírì je wò mí nje nó ta kábà .

⁶ À má gítí ye, à kpónó ga wú mítí m̀rì ye gî. Sè káa «r̀tì», wàa bà có tí nó 'ví cee gî. ⁷ Ye gò dú káa gó muu Mbírì. Ye kpò nje ndâ 'duù gbí ngèlè gî, ye bàkà nètè tí nó ta njembí ye gbaànjé gî. ⁸ Mboo tàkò tó nètè mì ye, náa Mbírì tí mbe waa yúcó kù kpolo tí tacó bà je ji ye ta r̀i bà ko mboo nètè mì ndâ 'duù ñìnó 'dáá mbe kù ù bà gí Bìndi-Mbírì nó kpónó kù ùndi ye á gbírì.

Ndâ 'dóó có mì Páwòlò gbí muu wó

⁹ Bàkà wotí mì lo wàa wò 'ví gí gálà gí mì ye, ¹⁰ tacó ndâ 'duù kpónó 'vaaka 'dáá 'do tí ye gî. Kèrèsènisì ya gí gbí to Gálátì gî, bìndi Títò ya gí gbí to Dàlìmàsìyà gî. Káa ñó ọ ndâ i muu to tí nó gii te Démàsì 'do tí ye ya tí gí gbí gbata

Tèsalónìkà gî. ¹¹ À kpónó káa Lúkà ká kù dù mì ze ta yí. Wò má kù gî , yo 'ví gî ta Màrikò. Tacó yí a kpóló-kpolo mbe konì ye ta nèté mì ye. ¹² Ye tuu Tikíkùsù gí mì yo Éfàsù kà gî. ¹³ Ye táánò si ndâ wáràgà mì ye ta ndâ bongo mì ye ji Kàrípù gbí gbata Tòrówà. Yo má kù gî , wò 'ví kaa ndú gî tí ji ye. Wò 'ví 'visì kapí lo gítí 'bí wáràgà mì ye ñìnò tí kpóló-kpolo nó ngé gî lá.

¹⁴ 'Dakò tí nó tí Àlèsándòrò tí muu-tàwu, mbe kù cee ndâ i 'do tí fádà nó, bàkà vò i ta ye ngé tè gî. A Mbírì ká bà 'vee gbí nje wó gítí ña vò i mì wó náa yí bàkà ta ye nò! ¹⁵ Wò 'ví kpolo tí lo 'do tí wó, tacó có mì wó dooko gí gbí có mì ndoo ngé gî lá.

¹⁶ Gbí kpédélé o bà ya ta ye gí gbí ngbàngà táánò, gbèe 'duù mbe 'dè có muu ye wálá. Ndâ 'duù 'dáá bè ye ta o tí nò gî. Mbírì 'ví ñò yê ọ ndú. ¹⁷ Káa Mbírì gii ọ tìyò á kapí ye, yí gii je wotí ji ye, tacó wàa ye 'ví dù tí tú mbe ma có mì yì ta kábà ji ndâ 'duù ñìnó náa ndú me ndâ Jùdéyà lá nó 'dáá gî, wàa ndú 'ví 'di . Bìndi yí gii 'vala ye 'do gbí nje ndâ siingii gî.

¹⁸ Mbírì bà 'vala ye 'do gbí ndâ vò i 'dáá gî. Yí bà ya ta ye gí 'bá mì wó gbírì ñìkì maa.

À ùlù Mbírì á kpóó ya tí ! Go-i-tí-nò.

Ndâ ndòngbú 'vé

¹⁹ Ye 'vee ndâ Pìrìsílà ta Àkùyílà, ta ndâ kòtí Ònèsifórù. ²⁰ Èrásitù táánò gii yee ta ze ká gbí gbata Kòrìndì, bìndi ye gii jee Tòròfìmù ta sé'ì tí wó mí gbí gbata Mìlétù. ²¹ Bàkà wotí mì lo wàa

yo 'ví gí á kùro ndâ pì mî ndâ kpo-kpò pípìrì tí
nó kèjì nò.

Ndâ Yùbùlù, ta Pùdénì, ta Línò, ta Kìlávúdiyà,
ta ndâ ná'vindí ndoo 'dáá gî 'vee wò ma.

²² Mbírì 'ví je njembí bà ñò yí tí Mbírì ni ji wò.
Mbírì delè 'ví konì yo 'dáá gî.

**Ngú bà toko nambeè mì Mbírì ta ndâ 'duù
Ndogo: Ngú bà toko nambeè mì Mbírì ta ndâ 'duù
New Testament**

copyright © 2001 Wycliffe Bible Translators, Inc.

Language: (Ndogo)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

14424ae9-b5af-591e-814e-49316d8d74aa